

justus: ergo induxit obligationem; imo contractum illum esse contra jus charitatis, non satis constat; quare, etc. Unde merito Theologi, in 4, distinct. 15, tractantes an restituere teneatur qui aliquid accepit in necessitate constitutus, de extrema fere id negant, quasi in minori alia sit concedendum.

9. *Sexta conclusio unde suadetur.* — Dico sexto: si quis extra casum extremæ necessitatis subveniat, vel obligetur ad subveniendum, non ex superfluis simpliciter, sed aliquo modo ex necessariis ad statum, non obligatur ad dandum, sed ad mutuandum, vel ad alium modum similem. Hoc probant argumenta primæ opinionis, et dicta in precedenti conclusione; præterea quia, ut patet ex præcedenti conclusione, res est incerta; ergo est explicanda suaviori modo. Item qui sic subvenit, etiam indiget illis bonis; ergo non sine causa potest se indemnum servare.

10. *Ad primum argumentum in num. 4.* — *Ad primam confirmationem.* — *Ad secundam.* — Ad argumentum primæ opinionis, dico non solum teneri divitem ad subveniendum, sed ad subveniendum modo consentaneo charitati, et secundum debitum usum rerum. Item obligari ad non imponendum proximo obligationem reddendi sine rationabili causa, et sic accipienda sunt loca ibi citata, vel certe procedunt potius de fœnore spirituali. Ad primam confirmationem negatur assumptum; et caput illud loquitur extra casum extremæ necessitatis, ut exponit divus Thomas, artic. 7, ad primum, citata quæst. 66. Alia etiam quæ adducuntur, facile solvuntur. Esau enim atque Agyptii non erant in extrema necessitate, quia habebant unde emerent; Joseph vero imponebat tributum ad bcnūm reipublicæ. Denique factum Tobiæ non est ad rem, quia Gabelus habebat unde redderet, ideoque chyrophrum ab illo accepit Tobias. Postremo lex quæ afferetur procedit in foro exteriori, aut certe juxta secundam, tertiam, vel ultimam conclusionem.

## SECTIO VI.

*Utrum qui omittit dare eleemosynam cum tenetur, obligetur ad resarcienda damna quæ inde eveniunt indigenti.*

1. *Quætionis explicatio.* — *Aliorum opinio, pro qua arguitur ex Cajetano et Turrecrematæ.* — *Confirmatur primo.* — *Secundo.* — Duo sunt consideranda. Aliud, quantitas ele-

mosynæ, et de hac omnes auctores fatentur, eum qui omittit dare, transacta necessitate, non obligari ad reddendam illam quantitatem, etiamsi necessitas fuerit extrema. Ratio est, quia tota illa operatio erat misericordiæ, non justitiae; loquimur enim de his qui sunt veri domini, non de dispensatoribus; nam hi contra justitiam agunt usurpando, et obligantur ad restituendum dominis, qui eis dispensandam quantitatem commiserant. Secundum est detrimentum quod secutum est proximo indigenti, ex eo quod illi non est subuentum. Et de hoc aliqui censem, eum qui omisit eleemosynam, præsertim in casu extremæ necessitatis, teneri ad restitutionem postea, si fortasse hac de causa proximus est mortuus, vel damnum aliud notabile incurrit, quod videtur indicare Cajetanus in Summa, verbo *Restitutio*, cap. 1, et potest sumi ex eodem cum divo Thoma 2. 2, quæst. 118, ubi dicit obligacionem ad subveniendum in extrema necessitate, oriri ex justitia legali; obligatio enim ex tali justitia videtur inducere obligationem restituendi. Turrecremata etiam, in cap. *Si fæneceraveris*, distinct. 86, dicit eam esse obligationem ex justitia, quamvis neget obligationem restituendi; idem sentit Sarmento, de Redditibus Eccles., 3 part., capit. 4. Probatur ratione; nam ille qui omittit eleemosynam hujusmodi, est causa moralis nocimenti proximi; ergo tenetur de damno: antecedens patet, quia tenetur evitare id; ergo si non facit, est causa. Unde Innocentius, capit. *Quantæ*, de Sententia excommunicationis, dicit esse participem homicidii, qui tenetur vitare, ac potest et non facit. Et idem sumi potest ex cap. *Non miserande*, 23, quæst. 7; et ex illo Ambrosii: *Si non paristi, occidisti*, quod refertur capit. *Pasce*, distinction. 86. Et confirmatur primo, nam qui est in extrema necessitate, potest sibi necessaria sumere, etiam per vim, quia tunc bona sunt communia; ergo alter detinendo injuriam illi facit. Confirmatur secundo, nam potest a judice compelli ad dandam eleemosynam, is qui dare potest commode; ergo intercedit aliqua obligatio justitiae; ergo obligat ad restituendum.

2. *Vera sententia.* — *Ad primam confirmationem.* — *Ad secundam confirmationem.* — Nihilominus respondeo illum non teneri ad restituendum aliquid; ita Sot., 5 de Justit., q. 4, art. 3; Covarruv., 2 Variarum, c. 44, num. 5; Adrian., in 4 de Restitut., quæst. 1; Navar., cap. 24, numer. 7, et de Redditibus, quæst. 2; sumitur ex Gloss., cap. *Non infe-*

*renda*, 24, quæst. 3; et suadetur, nam tunc solum obligatur quis ad resarcienda damna, quando sequuntur ex actione injuriosa, scilicet contra justitiam commutativam. Et confirmatur, quia titulus restitutionis tantum est duplex, injusta acceptio, et res accepta; ibi autem neuter intervenit. Ad argumentum ex Cajetano et Turrecremat., respondetur, sicut ille qui subvenire omisit non obligatur ex justitia commutativa, ita neque vere facit propriam injuriam, neque tenetur ad restitutionem, vel reparationem illius damni; et si fortasse obligatur interdum ex justitia legali, saltem respectu boni communis, at hujus justitiae violatio, non obligat ad restitutionem, ut suo loco dicetur<sup>1</sup>. Ad rationem dic, solum probare mortem vel damnum proximi esse voluntarium omittenti eleemosynam, non tamen esse effectum ab illo, quia ut ego sim causa mortis proximi, non satis est velle illam, sed oportet aliquo modo influere; hic autem non influit physice, ut per se constat, neque moraliter, quia non facit injuriam. In capitulis autem cœtatis, modus loquendi latior est aliquanto, nam homicida dicitur, qui quovis modo vult mortem proximi; itaque solum intenditur illud damnum proximi imputari alteri ad culpam, sed non ad injuriam. Ad primam confirmationem, dic nihil referre quod in extrema necessitate bona sint communia, nam ex vi illius juris solum quisque valet ea primo occupare absque injuria alterius, id est, nullam alteri vim faciendo. Ad secundam confirmationem, ut quis possit obligari a judice, satis esset obligatio justitiae legalis, quando necessitas communis intercedit. Præterea leges et magistratus civiles non solum actus justitiae, sed etiam misericordiæ, et temperantiae imperare possunt, et ita nihil sequitur contrarium nostre resolutioni.

3. *Dubium d' Ecclesiasticorum eleemosynis.* — Restabat dubium, an saltem habentes ecclesiastica bona teneantur ex justitia ad dandam eleemosynam, atque adeo, si omittant, teneantur ad restitutionem. Quod late disputant tum Theologi, tum jurisprudentiæ, et affirmant non pauci. Hic tamen omisis aliis ad tractationem de redditibus, solum in genere dico, ex his bonis, quorum ecclesiastici sunt domini, teneri ex solo vinculo charitatis, majori tamen quam alii, tum quia debent esse Patres pauperum, præcipue Episcopi, ex 1 ad Ti-

<sup>1</sup> Vide in opusc. de Justit. Dei, sect. 4, in fine.

moth. 3, et ad Titum 1: *Oportet Episcopum irreprehensibilem esse*, etc., *hospitalem, benignum*, etc. Et docet Tridentinum, sess. 23, cap. 4, de Reformatione; tñm quia ratione status debent esse alii exemplo. Denique, quia facilis habent superflua; non enim habent quibus ex officio thesaurizent, et in familiæ et statu debent esse moderatores, ut monet idem Concilium Tridentinum sess. 23, capit. 4, de Reformatione. Si vero habent aliqua bona ecclesiastica, quorum non sunt domini, sed illis designata sunt ut distribuant in pauperes, tenentur ex justitia dare, sub obligatione restituendi; an vero aliqua bona sint hujusmodi, dicetur in materia de Decimis<sup>2</sup>. Nostram vero resolutionem tradunt Cajetanus, quæst. 87, art. 3, et 183, artic. 7; Soto, lib. 10 de Justitia, quæst. 4, artic. 3; Covar., de Testamentis, cap. 10, et lib. 2 Variarum, cap. 17, num. 5; Navar. et Sarmen., in tractatibus de Redditibus ecclesiasticis, et alii recentiores.

4. *Advertendum diligenter.* — Ultimo, est in hæc materia advertendum que hactenus de eleemosyna corporali dicta sunt, etsi videantur peculiärer dici de illis operibus misericordiæ, quæ fiunt per externas divitias, tamen eodem modo, et per easdem leges applicanda esse ad ea opera misericordiæ, quæ consistunt in actionibus humanis, ut sunt visitare infirmum, vel in carcere constitutum. Nam hæ actiones sunt bona quædam, quæ tribuimus indigenti. Unde consideranda est in his necessitas ex parte proximi, id est, an tui indigeat illo tempore, et actione. Idem de advoco, quando pauperis jus periclitatur, ne defectu patrocinii a potentiore violetur.

## DISPUTATIO VIII.

## DE PRÆCEPTO CORRECTIONIS FRATERNÆ.

*Primum præmissum.* — *Secundum.* — *Tertium.* — Ex dictis in precedenti disputatione, colligi satis potest opera spiritualia misericordiæ non minus esse in præcepto, quam corporalia; quia et sunt magis necessaria proximis, et facilis exhiberi possunt sine incommodo dantis, et materia est nobilior. Deinde supponendum est hæc opera distingui in septem membra, de quorum primo, scilicet, de remissione injuriarum, supra satis dictum est, cum de inimicorum dilectione ageremus, disput. 5, sect. 5, et ad idem opus spectat patien-

<sup>2</sup> Vide l. 1 de Divino cultu, cap. 44.

ter ferre aliorum molestias; nam hi duo actus fere sunt ejusdem rationis, et hic secundus fere nunquam cadit in præceptum, nisi quando vel includit primum, vel necessarius est ad vitandam proximi injuriam, aut aliam inordinationem contra alteram virtutem. De alio opere, quod est orare, dicendum est in materia de religione<sup>1</sup>. Quartum, de consolandis afflictis, nihil habet proprium, præter generaliter dicta de eleemosyna corporali, nam, licet hoc opus ad animam pertineat, tamen præcipue ad corporis necessitatem spectat. Superest igitur dicamus de fraterna correctione, ad quod etiam revocabimus duo, consilium dare, et docere, in quibus generales regulæ necessitatis proximi, et facultatis operantis servandæ sunt; sed quia applicatio earum in correctione fraterna habet speciale difficultatem, ideo de hoc specialiter agunt Theologi. Tertio, est supponendum duplēcēm esse proximi correctionem: alteram judiciale, quæ sit via publica, et tendit non tam in ejus emendationem qui corrigitur, quam in castigationem et poenam ob commune bonum. Alteram charitativam, cuius finis est bonum et emendatio ejus qui corrigitur, in qua possunt multi actus intercedere, de quibus primo in genere, deinde sigillatim dicemus.

## SECTIO I.

*Utrum hac fraterna correctio cadat in præcepto.*

1. *Quorundam error.* — *Pelagii error, de quo ex professo tom. 1 de Gratia.* — Etsi vocabula *correptio* et *correctio* in rigore distinctionem habeant, quam attigit Augustinus, lib. 1 de Civit., cap. 9, quod correptio reprehensionem solum, correctio autem emendam simul importet, Theologi tamen promiscue iis vocibus utuntur, quando de hoc actu charitatis disputant. Fuit igitur error, hunc actum non solum non esse præceptum, sed esse otiosum, quia sine gratia Dei frater non potest emendari, etiamsi corrigatur; et si gratia adsit, licet non corrigatur, emendabitur. Ad quem errorem vitandum Pelagius, ut utilitatem correctionis tueretur, gratiæ necessitatem negavit; et ad docendam viam medium scripsit Augustinus libros de Correctione et gratia.

2. *Prima conclusio.* — *Ad hæreticorum argumentum.* — Dico primo hunc actum honestum lib. 4 de Oratione, cap. 16.

<sup>1</sup> Habetur lib. 4 de Oratione, cap. 16.

tum esse, et misericordiae et charitatis. Est de fide, Proverb. 27: *Melior est manifesta correptio, quam amor absconditus;* Eccles. 29: *Melius est a sapiente corripi, quam stultorum adulacione decipi;* Eccles. 19: *Qui odit correctionem, minuetur vita, etc.*; Psalm. 140: *Corripit me justus in misericordia, etc.*; Matth. 18: *Si peccaverit in te frater tuus, corripe illum, etc.*; Thessal. 3: *Nolite quasi inimicum aestimare (hominem, scilicet, inobedientem), sed corripite ut fratrem.* Deinde communis est hac in re consensio Patrum, et omnium recte sentientium; dum non solum in actu signato (ut ita dicam) corripiendos esse monent errantes, sed etiam dum in actu exercito suis concionibus, exhortationibusque via reprobent. Ultimo, ratione a priori ostenditur conclusio; nam hoc opus est medium per se ordinatum ad bonum proximi, et de se sublevat miseriam peccantis, impedit offenditum Dei, et tollit aliis proximis offendicula: ergo perfectissime habet honestatem charitatis et misericordiae. Neque argumentum hæreticorum urget; gratia enim non movet homines ut lapides, sed modo accommodato humanæ naturæ; unde correctio deserbit, ut homo se disponat ad gratiam, vel certe non ponat illi obicem. Deinde cum homo facit quod in se est, corrigendo, Deus adjungit gratiam, si alter non resistit. Sed advertendum (ut intelligatur a qua virtute sit ista actio) in illa concurrere et voluntatem corripiendi, quæ potest esse elicita a misericordia, et imperata a charitate, et actum intellectus per prudentiam dirigen tem exteriorem correctionem. Nam in hoc actu non solum concurrit prudentia, ut antecedens voluntatem, imperando ut velit corriger, sed etiam concurrit subsequendo, quia ipsam correctio debet prudenter fieri, si a virtute est; et ideo, qui vult corriger, necesse est applicare prudentiam ad ipsum actum correctionis, propter quod dixit Cajetanus, 2. 2, quæst. 33, articul. 1, hunc actum elici a prudentia, et imperari a misericordia, quod spectat ad modum loquendi. Nam res ipsa constat, ad quam certe maxime spectat, ut in hoc actu circumstantiae prudentiae, et spiritus lenitatis observentur. Vide Basil. in id Psalm. 14: *Et opprobrium non accepit, dicentem, debere esse correctionem sine ulla exprobratione;* et supra dixerat, benevolentiam, potius quam severitatem, quam commotionem, charitatem, quam potestatem, esse ostendendam. Et eodem modo loquuntur Nazianzenus, in orat. de Moderatione in disputationibus ha-

benda; Leo Papa, epist. 84 ad Anastas., cap. 1, et alii.

3. *Secunda conclusio bimembris.* — *Probatur primum membrum ex Scriptura.* — *Probatur secundum membrum.* — Dico secundo datum esse præceptum de hoc actu, tam divinum quam naturale. Primum patet tum ex locis Scripturæ citatis, tum maxime ex Matth. 18, 1 ad Timoth. 5, initio, et 1 ad Thessalon. 5: *Corripite inquietos, etc.*; idem aperte sentiunt Patres, quoties peccati damnant, qui utilem correctionem aliorum negligunt, nominatim Chrysostomus, homil. 60 in Matth.; Hieronymus, in citatum Psalm. 140; Augustinus, sermon. 16 de Verbis Domini; Gregorius, libr. 12 Regist., epistol. 31. Dices posse exponi hæc verba pro consilio, quia non videtur esse verbum præceptivum. Propterea Soto, de Tegendo secreto, membr. 2, quæstione prima, conclusione quarta, dicit non esse hæreticum negare hoc speciale præceptum; fortasse intellegit ex vi illius testimonii Matth. 18. Dico tamen simpliciter esse hæreticum negare illud, et fere hæreticum negare contineri in citatis locis Scripturæ. Utrumque patet, primo ex tunc citatis, tum quia Theologi ac jurisprudenti communiter agnoscent hoc præceptum. Item verbum (*corripe*) præceptivum est, et materia gravis, et charitati necessaria, ut dicemus; et Luc. 17, eodem tenore præcipitur correctio, et injuriarum remissio; et ad Galat. 6: *Hujusmodi construite, etc.*, subdit: *Sic enim ad impletib[us] legem Christi.* Tandem ago ratione, confirmando ultimam partem conclusionis; nam hoc non est aliud a præcepto eleemosynæ, sed una ex præcipuis partibus ejus; teneatur autem naturali etiam præcepto subvenire proximo patienti necessitatem corporalem, ut patet; multo magis ergo patienti spirituali, quod præstamus corripiendo; sic fere Chrysostomus, Homil. 13 ad Populum, argumentatur. Aristoteles quoque, 9 Ethicorum, cap. tertio, scribit pravum amicum corrigendum esse, ac magis juvandum in moribus quam in pecuniis, dissolvendamque amicitiam, si negligat correctionem. Oppones: proximus non est in tanta necessitate peccandi, ut non possit ipse sibi subvenire, et bene utendo sua libertate, et petendo auxilium a Deo. Potest quidem proximus, absolute loquendo, hoc efficeri; tamen interdum est difficile valde propter vel consuetudinem, vel passionem, vel etiam inadvertentiam. Denique saepe est evidens periculum morale, non usurum proximum ea potestate, nisi aliunde ab extrinseco adjuve-

tur: quamvis enim hoc Deus faciat interius, et angelus custos, tamen etiam *unicuique mandavit Deus de proximo suo.* Vide Chrysostomum, homil. 44 in 4 ad Corinth., et orat. 1 contra Judeos.

4. *Tertia conclusio* — Dico tertio: hoc præceptum genere suo obligat ad mortale. Sequitur ex initio præcedentis disputationis; nam præceptum misericordiae, ut ibi dictum est, ex genere suo ita obligat; hoc autem præcipit unam ex præcipuis misericordiae partibus: ergo. Item gravius obligat quam præceptum eleemosynæ corporalis, cum gravior miseria sit parentia boni spiritualis quam corporalis; illud autem, ut etiam ostendimus, obligat sub mortali ex genere suo: ergo, etc. Contra, quia fere nullus est qui corrigat, et tamen nullus confitetur hoc peccatum; neque confessores interrogant de illo, quod signum est tale præceptum non extare. Respondetur potius timoratus conscientia interdum se accusare de transgressione hujus præcepti; et confessarii, si necessarium judicent, debent interrogare; tamen quia, ut vidimus, obligatio præcepti non frequenter occurrit, et obscurior est, ita et rarius contra illud peccatur, unde multi fortasse excusantur.

## SECTIO II.

*Quænam sit materia hujus præcepti.*

1. *Prima conclusio.* — Dico primo: omne peccatum mortale proximi est de se materia gravis, et sufficiens ut hoc præceptum obliget. Ita docent communiter auctores, et colliguntur ex illo Matth. 18: *Lucratus eris fratrem tuum;* omne enim peccatum mortale tollit vitam spiritualem proximi; ergo de se sufficientem inducit necessitatem ut lucremur illum. Sed advertendum est peccatum hoc posse esse commissum, et jam emendatum, ac sine occasione et periculo reincidendi; sic vero illud non esse materiam hujus præcepti, quia jam proximus non est in miseria, et hoc sensu intelligenda est Glossa, in cap. *Si peccaverit*, dicens peccatum præteritum non esse materiam correctionis, licet posset esse accusationis, quia illa tendit ad emendationem, quæ jam facta supponitur; hæc vero ad pœnam, que locum habet etiam post emendationem. Alio modo potest peccatum esse commissum, sed non emendatum, et hoc potest esse materia correctionis, cap. *Cum ex injuncto*, de Hæreticis. Ratio est, quia tunc proximus subest miseriae, et maxi-

me si sit periculum reincendi. Tertio, potest esse peccatum nondum commisum, sed tamen in occasione committendi, et de hoc statim dicam.

2. *Errores tres excluduntur.* — Hinc excluduntur tres errores. Primus est, præceptum hoc obligare tantum in peccatis commissis in propriam injuriam, propter illud verbum Evangelii : *Si peccaverit in te, id est, contra te*, ut multi Patres exponunt, ut Hieronymus, et Chrysostomus illo loco; item Ambrosius, in capit. 17 Lucæ; Hilarius, can. 18 in Matth.; sed hic error est contra mentem Christi; ponit enim præceptum, non ut quis amoveat a se propriam injuriam, sed ut lucretur fratrem, qui finis locum habet in omni peccato mortali. Itaque particula *in te*, expoundenda etiam est *coram te*, id est, cum scandalo tuo; ita plerique Patres, et omnes Theologi, ut Augustinus, serm. 16 de Verbis Domini; D. Thomas, Quodlib. 11, art. 12; Liran., citato loco Matth., et alii. (Legatur Salmer., tom. 4 in Evangelia, p. 3, tract. 11.)

3. Alter error est, materiam hujus correctionis esse peccatum ex ignorantia vel passione, non ex malitia: fundatur, quia cum hoc sit voluntarium, non habet rationem miseriae. Sed improbatur, quia illa est maxima miseria, ut disputat. 4, sect. 1, num. 4, dixi, et major Dei offensa, et semper intervenit sufficiens ratio involuntarii propter aliquam saltem inconsiderationem; et quia licet objectum sit voluntarium, tamen et malitia, et multi effectus peccati sunt involuntarii, ut alibi dicebamus.

4. Tertius est, peccata venialia esse materiam hujus præcepti, non mortalia; indicat Origenes, homilia sexta in Matth., quia peccatum mortale non est peccatum fratris. Sed hoc nihil valet, nam nomine fratris significatur ibi omnis proximus, etiamsi sit in peccato mortali, ut patet 2 Thessalonice. tertio : *Dennuntiamus vobis fratres in nomine Domini Iesu Christi, ut subtrahatis vos ab omni fratre ambulante inordinate, et non secundum traditionem quam acceperunt a nobis*, etc.

5. Secunda conclusio. — *Objectio.* — *Responsio Sylvest. et aliorum, quos citat et sequitur Azor.*, tom. 2, l. 12, c. 14, q. 4. — *Plana responsio.* — Dico secundo peccatum veniale posse esse materiam correctionis, sed non in qua hoc præceptum graviter obligat. Prior pars facilis est, et communis; secunda etiam colligitur ex verbis Evangelii, quæ supponunt fratrem periisse, ut Augustinus ponderat,

serm. 16 de Verbis Domini, ex illis verbis : *Lucratus eris; et ex poena : Sit tibi tanquam ethnicus et publicanus.* Ratio est, quia consulere veniale peccatum non est mortale; minus autem est non corripiere: item miseria illa levius est. Objicies: peccatum veniale est major miseria quam gravissimum damnum temporale; sed hoc teneor vitare, si possum, sub mortali; ergo et illud. Sed neganda est consequentia, primo, quia alias teneretur etiam quis suum veniale peccatum fugere sub mortali, quod absurdum est, et implicationem continens. Secundo, quia sunt illa mala diversorum ordinum, atque adeo minime comparabilia, ac præceptum unicuique accommodandum est, juxta illum gradum, quem habet in suo ordine, ita enim postulat et recta ratio, et necessitas præcepti. Addo denique temporale damnum et magis involuntarium esse, et difficilius expelli. Secundo objicies: sæpe veniale est dispositio moralis et proxima ad mortale, ut jurare frequenter, et similia. Ergo tunc saltem erit obligatio ad mortale, quia proximus est in gravi periculo et necessitate. Sylvester, verbo *Correctio*, q. 1, et Turrecrem., cap. *Si peccaverit*, et Soto supra, et alii ita concedunt. Dico tamen: qui sic venialiter peccat, aut advertit periculum suum, et tunc jam peccat mortaliter, quia ut ait Sapientis : *Qui amat periculum, peribit in illo*, Eccles. 3; aut non advertit, ita ut excusat a mortali culpa, et tunc dari poterit obligatio sub mortali admonendi illum; sed illud non tam est præceptum corripiendi, quam consulendi, vel ostendendi proximo id quod ignorat.

6. *Dubium, de quo in simili Sanch., l. 2, disput. 38, et Azor, tom. 1, l. 12, c. 25, q. 4 et 5.* — Et simili modo expeditur aliud dubium, an si opus fratris sit de se peccatum mortale, ille autem excusat a culpa propter ignorantiam invincibilem, teneat corripiere. Respondetur enim præceptum spirituialis misericordiae proximi posse habere locum in tali materia, ut sentit Antonin., 2 part., tit. 9, § 4; Sylvester, *Correctio*, dub. 10; Angelus, eodem verbo, num. 6; sed non esse tam correctionis, quam dandi consilii vel doctrinæ. Hoc ultimum patet, quia proximus ibi non deliquit neque periret. Primum vero constat, quia illa est quædam proximi miseria, quæ per misericordiam sublevari potest et debet. Urgebis: quamvis sit quoddam malum, non tamen constituit proximum in necessitate, cum excusat a peccato; ergo non est

malum quod obliget. Respondetur primo, ipsam ignorantiam in rebus necessariis ad honeste vivendum, ut sunt, quæ divino aut naturali jure sunt necessaria ad honestam vitam christianam, per se esse magnum malum, maxime si sit de mediis necessariis ad salutem, vel multum utilibus. Præterea interdum ratione ignorantiae subit proximus magnum damnum in bonis etiam corporis, vel vita et honore. Unde non est dubium quin possit hoc esse sufficiens materia charitatis et misericordiae, pertinetque ad omnes qui dovere possunt, vel consulere, ut Patres colligunt ex parabola Matth. 25, de servo reprehenso, qui unum talentum abscondit, intelligentes de talento doctrinæ et obligatione charitatis. Quod præceptum strictius obligat eos, ad quos veluti ratione status hoc munus spectat, de quo D. Thomas 2. 2, quæst. 188, art. 4 et 5; sed maxime ad eos qui tenentur ex officio et justitia; oportet tamen in hoc servare circumstantias de quibus in sectione sequenti. Sed quæres an veniale peccatum sit corrigendum saltem sub obligatione ad veniale. Soto, statim citandus, affirmit ex illo Joan. 13 : *Et vos debetis alter alterius lavare pedes.* Sancti enim ibi intelligunt leviores defectus, juxta illud : *Qui lotus est, non indiget, nisi ut pedes laret.* Ratio vero est, quia peccatum veniale est deformitas quædam proximi, et potest impedire multa bona. Confirmatur; nam similiter in miseria corporali ejusdem proportionis, si sine causa contemnerem miseriam fratris, esset veniale. Respondetur argumenta concludere, posse interdum esse hanc obligationem, præcipue inter eos qui profitentur altiore statum, et inter quos veniala sint graviora, atque afferant aliquod scandalum vel indecentiam; tamen regulariter non est scrupulus habendus in hac re, et juxta hanc resolutionem procedunt, qui simpliciter aiunt præceptum correctionis non extendi ad venialia, ut Adrianus, in quæstione de Correctione fraterna, § *Quoad tertium*; Abulens., Matth. 18, quæst. 82; Paludanus, 4, distinct. 19, quæst. 3, art. 2; Gabriel, lection. 74, in Cano; Sylvester, *Correctio*, quæst. 4. Addendum est ultimo, cum Soto, de Tegendo secreto, memb. 2, quæst. 2, conclus. 3, et aliis recentioribus, hæc intelligenda esse stando intra limites charitatis, et misericordiae; nam si admisceatur obligatio justitiae, interdum potest aliquis obligari ad corrigenda hæc venialia peccata, ut accidere potest in superiore religionis, qui ex officio et justitia tenetur cu-

rare, non solum ut subditi vitent mortalia, sed etiam ut ad perfectionem tendant, atque adeo ut vitent impedimenta; quapropter, si nimium se gerat prælatus negligenter, et maxime si defectus sint generales communictatis, poterit esse obligatio sub mortali ad corrugenda illa, quam obligationem aliqui extendent ad privatas personas; sed non ita existimo, nisi habeant in aliquibus actionibus vicem prælati, observando nimirum aliorum defectus, vel etiam interdum teneantur illum sui officii admonere; de cæteris enim plusquam verum est non teneri aliorum vitam scrutari, ut docet D. Thomas, 2. 2, quæst. 33, art. 2, ad 4, ex Salomone et Augustino; Cajetan., in Summa, verbo *Correctio fraterna*, Sylvest., eodem verbo, num. 3, et alii.

## SECTIO III.

*Quando et cum quibus aliis circumstantiis obliget hoc præceptum.*

1. *Prima conclusio.* — *Quæ delicti cognitio requiratur ad fraternam correctionem.* — Dico primo: ante omnia, necesse est ut delictum proximi sufficienter constet, ut insinuatur illo verbo Evangelii, *In te, id est, coram te*, ut ex citatis præcedenti sectione, num. 4 habetur. Ratio est, quia alias esset temeraria, nec sine injuria correptio. Quæres quæ sit ista cognitione. Adrianus supra, § *Sed hæc opinio*, respondet, esse probabilem conjecturam; hæc enim sufficit ad præceptum eleemosynæ corporalis; Soto, de Secreto, memb. 2, quæst. 2, conclus. 2, requirit certam cognitionem, quæ intelligitur de morali certitudine; et regulariter est verius, quia correctio de se est odiosa, et affert verecundiam alteri; et nisi prudenter fiat, est quoddam genus contumelie, in quo multum differt ab aliis eleemosynis; et ita ante Sotum senserunt Gerson, de Vita spirituali, tractat. 24; Astensis, in Summa, lib. 2, tit. 6, cap. 4; et tandem Navar., cap. 24, num. 12; si tamen delictum appareret grave, et magni periculi, vel cum esset spes emenda, et nullus timor exacerbandi proximum, habere posset locum sententia Adriani; quare in individuo prudentia opus est.

2. *Secunda conclusio.* — *Objectio solvit tripliciter.* — Dico secundo: præter notitiam delicti, est necessaria spes fructus et emendationis. Est contra Panormit., cap. *Norit*, de Judicis, qui ait, etsi constet proximum non fore emendandum, obligari ex præcepto,